

甚未安若他餘之病其證差愈則易起行也腫證則勢固久矣此腫已破餘毒未消濃水連出大槩則幾愈瘡口亦未合故不出房外此意內醫院提調及都承旨暨醫員則皆知之外庭何可盡知二三朔內難以視事待從亦所當知○夜良弼坤方有氣如火○戊申議政府全數啓曰今聞瘡口雖未合大槩則幾愈云此則雖一身之病人君乃宗社一國生民之主也得此大病數月見愈宗社朝野莫大之慶所當陳賀使禮曹考前例則前例亦有之王后病愈亦未嘗不賀況此則異於王后且外方百姓不知上體復寧與否而遑遑憂疑尤當受賀使四方知其大愈矣若以一家比之東宮亦豈不欲陳賀乎雖不就臨亦可為之請使禮曹考其古例傳曰昨敎政院之意非他予得此證久廢視事亦停經筵故未接賢士大夫心甚未寧故欲使下人知此意而言之耳予證時未盡愈不可受賀況古者先后未寧之證與此證亦殊腫證則勢必彌留雖至旬月之久何敢受賀是故禮曹已請陳賀而不見耳復寧視事則中外自可知其愈矣豈敢陳賀然後知之乎光弼等三啓不見○日暈太白見於未地○已酉議政府六曹及諸宰樞啓曰一國之士豈可自謂一身疾病而不受群臣之賀乎當以宗廟社稷為重以答